

POESÍA

Unha fundación difundirá a obra do muxián López Abente

Numerosas institucións galegas participan na entidade creada onte

X. Ameixeiras | CARBALLO / LA VOZ | 30/1/2011



O Concello de Muxía e un grupo de intelectuais, coa colaboración das principais institucións culturais de Galicia, crearon oficialmente onte a Fundación Gonzalo López Abente, unha institución que nace co propósito de sacar do esquecemento a obra dun dos tres principais poetas galegos da primeira metade do século XX. O acto tivo lugar nun ateigado salón de sesións do concello muxián e foi presidido polo alcalde, Félix Porto, quen dixo que a nova entidade nace co compromiso de que as xeracións futuras poidan gozar do legado dun poeta que é «un dos máis valiosos referentes da nosa terra».

Firmaron como patróns os presidentes da Real Academia Galega, Xosé Luís Méndez Ferrín, e a Deputación da Coruña, Salvador Fernández Moreda; os reitores das universidades da Coruña e Santiago, José María Barja e Juan José Casares; Francisco Díaz-Fierros, polo Consello da Cultura Galega; Luís González Tosar, do PEN de Galicia, e Cesáreo Sánchez Iglesias, da Asociación de Escritores en Lingua Galega.

A fundación ten como primeiros obxectivos publicar as obras Bretemada, que aínda está inédita; Noveliñas do Mar, unha recompilación das súas novelas curtas, e a reedición dunha antoloxía poética do autor, entre outras tarefas. Toda a obra de López Abente está esgotada actualmente.

A xornada completouse cunha visita á tumba de López Abente, diante da que recitaron versos de Abente Ribadulla Corcón, Miro Villar, González Tosar, Cesáreo Sánchez, Méndez Ferrín e Antonio Balboa, parente do homenaxeado.

A xornada rematou na sede da fundación, a Casa das Beiras, coa interpretación por primeira vez en galego do himno da Barca, do que Abente é autor.